



TOSHKENT DAVLAT YURIDIK UNIVERSITETI REKTORINING B U Y R U G ' I

25.03.2024

186-tm-son

Talabalar safidan chetlashtirish to'g'risida

Bugungi kunda universitetda yuqori malakali yuridik kadrlarni tayyorlash maqsadida talabalarni ma'naviy-axloqiy tarbiyalash, ularning huquqiy madaniyati va ongini oshirish bo'yicha samarali tizimni yaratish, ularda yuksak ma'naviy-axloqiy fazilatlarni shakllantirish hamda rivojlantirish maqsadida bir qator kompleks chora-tadbirlar amalga oshirilmoqda.

Shunga qaramasdan ayrim talabalar tomonidan universitet faoliyati haqida noto'g'ri munosabat, fikr-mulohaza shakllanishiga, universitet obro'siga, universitetda yaratilayotgan ochiq-oshkoralik siyosatiga zarar yetkazadigan qasddan harakatlar qilinib, universitet Odob-axloq kodeksida belgilangan me'yorlarni buzish holatlari kuzatilmoqda.

Jumladan, 2024-yil 6-mart kuni soat taxminan 08:30 da universitet 2-binosi 321-xonada to'lov-kontrakt asosida tahsil oluvchi Jinoiy odil sudlov fakulteti 3-kurs talabasi Pulatov Otabek Abdujabbor o'g'li o'zining kursdoshi Aliqulov Feruz Shojalil o'g'liga qarata "aka qilolmaysizmi?" deb haqoratli gap aytgan. Talaba F.Aliqulov esa "hazil qilma o'zingdan ketyabsanmi xu**at qilyabsanmi? U gapni dadangga aytasan" deb aytgan vaqtida dars olib borayotgan o'qituvchi S.Maxmudov tomonidan talabalarga tanbeh berilib, dars mashg'uloti davomida tinchlikni saqlab o'tirishlari to'g'risida ogohlantirilgan.

Shundan so'ng, dars mashg'ulotining birinchi soati tugab soat 09:20 da tanaffus vaqtida talaba F.Aliqulov O.Pulatovga tashqariga chiqib gaplashib olishlarini aytib, uni 2-binoning orqa qismida joylashgan yo'lakka olib chiqadi. Mazkur joyda talaba F.Aliqulov O.Pulatovning yoqasidan ushlab "sen nega yosh bola bo'lib xu**at qilyabsan" degan, O.Pulatov esa F.Aliqulovga "sen oldin ham xu**at qiluvding" deb o'zaro bir-birlarini uyatli so'zlar bilan haqoratlashgan va talaba O.Pulatov F.Aliqulovni yuz qismiga mushti bilan bir marotaba urib tan jarohati yetkazganda kursdoshlari tomonidan ajratilgan.

Talaba F.Aliqulov O.Pulatov bilan gaplashib olish maqsadida unga "Yoshlik" kafesi tomonga borishlarini aytib, ular "Yoshlik" kafesi tomonga ketishayotgan vaqti talaba F.Aliqulov O.Pulatovning yuz qismiga to'satdan mushti

bilan bir marotaba urgan. Shundan so'ng talaba O.Pulatov F.Aliqulovni ko'tarib yerga zarb bilan yotqizib (бpocок) tanasining duch kelgan qismiga qo'llari bilan bir necha marotaba urib tan jarohati yetkazgan. Ushbu holatni uzoqdan ko'rib qolgan kursdoshlari ularni ajratishib, talaba F.Aliqulovning yelka sohasi qiyshayib sinishi kabi tan jarohatlari mavjudligi sababli 103 raqamiga qo'ng'iroq qilishib tez tibbiy yordam xizmatini chaqirishgan.

Talabalar Pulatov Otabek Abdujabbor o'g'li va Aliqulov Feruz Shojalil o'g'li Universitet Odob-axloq komissiyasining 2024-yil 12-mart kungi yig'ilishida haqiqatda ular o'zaro bir-biriga haqoratli gaplarni aytib mushtlashishganligini tan olib ko'rsatuv berishgan, shuningdek, bu xususida fakultet dekanatiga ham yozma tarzda tushuntirish xatlari yozib berishgan.

Talabalar Pulatov Otabek Abdujabbor o'g'li va Aliqulov Feruz Shojalil o'g'li o'zlarining yuqoridagi xatti-harakatlari bilan Oliy ta'lim to'g'risidagi nizomning (ro'yxat raqami 1222, 2003- yil 22-fevral) 43-bandi hamda Toshkent davlat yuridik universiteti Odob-axloq kodeksining 15-modda 2-xatboshisi (o'z harakatlari bilan Universitet imijini saqlash va oshirish, Universitet, uning xodimlari, talabalari va doktorantlari nomi va manfaatlariga asossiz ravishda ziyon yetkazadigan harakatlarni amalga oshirmaslik, shuningdek, ular bilan muloqot qilganda hamda jamoat oldida, ommaviy axborot vositalari, Internet, ijtimoiy tarmoq va messenjerlardagi chiqish va yozishmalarida o'zlarining namunali xulq-atvori bilan Universitet haqida yuksak ijobiy taasurot uyg'otish), 17-modda 2-xatboshisi (har qanday huquqbuzarlik yoki jinoyat sodir etish, jumladan, tuhmat qilish, haqoratlash), 17-modda 4-xatboshisi (tinchlik yoki osoyishtalikka qarshi tajovuz qilish, janjallashish), 18-modda 1-xatboshisi (Xodim, talaba va doktorantlarning o'zaro munosabatlari milliy qadriyat va an'analar, yagona jamoaviy muhit, o'zaro hurmat va e'tibor, do'stlik, hamjihatlik, halollik va adolat tamoyillariga asoslanishi lozim), 18-modda 2-xatboshisi (Xodim, talaba va doktorantlarning o'zaro munosabatlarida inson qadr-qimmatiga hurmatsizlik, shaxsiyatni kamsitish, qo'pollik, behayo so'zlar ishlatish, mushtlashish qat'ian man etiladi), 26-modda 4-xatboshisi (odob-axloqqa oid milliy an'analarimiz, urf-odat va qadriyatlarimizni hurmat qilish kabi talablarni qo'pol ravishda buzgan)da belgilangan qoidalarni qo'pol ravishda buzishgan.

Yuqoridagilarni inobatga olib, O'zbekiston Respublikasi Vazirlar Mahkamasining 2017-yil 20-iyundagi 393-son qarori bilan tasdiqlangan Oliy ta'lim muassasalari talabalari o'qishini ko'chirish, qayta tiklash va o'qishdan chetlashtirish tartibi to'g'risidagi nizomning 36-bandi "g" kichik bandi, O'zbekiston Respublikasi Vazirlar Mahkamasining 2021-yil 10-iyundagi 359-son qarori bilan tasdiqlangan Toshkent davlat yuridik universitetida ta'limning kredit-modul tizimida o'quv jarayonini tashkil etish tartibi to'g'risidagi Nizomning

43-bandi to'rtinchi xatboshisi, Oliy ta'lim to'g'risidagi nizomning (ro'yxat raqami 1222, 2003-yil 22-fevral) 51-bandi, universitet Ichki tartib qoidalarining 83-bandiga asosan, shuningdek, universitet Odob-axloq komissiyasining 2024-yil 12-martdagi 34-son yig'ilish bayoniga muvofiq,

BUYURAMAN:

1. Toshkent davlat yuridik universiteti Odob-axloq komissiyasining 2024-yil 12-martdagi 34-son yig'ilish bayoni ma'lumot va ijro uchun qabul qilinsin.

2. Jinoiy odil sudlov fakulteti 3-kursida to'lov-kontrakt asosida tahsil oluvchi talabalari Pulatov Otabek Abdujabbor o'g'li va Aliqulov Feruz Shojalil o'g'li **talabalar safidan chetlashtirilsin.**

3. Ta'lim shartnomalari va to'lovlarni muvofiqlashtirish bo'limi (I.Ro'zibayev) va buxgalteriya (M.Parpiyev) talaba bilan tuzilgan shartnomani tegishli tartibda bekor qilsin hamda hisob-kitob ishlarini amalga oshirsin.

4. Jinoiy odil sudlov fakulteti 3-kurs talabalari Abduxoliqov Temurbek Ne'matulla o'g'li, Abdumo'minov Abbos Sodiqjon o'g'li, Satimov Javohir Xudaybergan o'g'li, Amrullayev Bobirjon Nodirbek o'g'li, Yernazarov Danil Yernazarovich, Sirojiddinov Xumoyun Xusniddin o'g'li, Orifjonov Shahzod Shavkatzoda, Po'lotov Bekzod Tuyg'un o'g'li, Saidov Dilshodbek Zafar o'g'lilarga vaziyat haqida dekanat yoki universitet mas'ul shaxslariga o'z vaqtida xabar bermaganliklari uchun kelgusida xayfsan intizomiy jazo chorasi qo'llanilishi mumkinligi yuzasidan **ogohlantirilsin.**

5. Fakultet dekanlari (Sh.Saydullayev, D.Umarxanova, D.Kamalova, B.Musayev, A.Babadjanov) mazkur buyruq mazmun-mohiyatini talabalarning shaxsini sir saqlagan holda talabalar e'tiboriga yetkazilishi va har bir akademik guruhda **o'zlari kirgan holda** keng muhokama qilinishini hamda talabalarga Odob-axloq kodeksi va boshqa ichki hujjatlarga amal qilishlarini shaxsan tushuntirishlarini ta'minlasin.

6. Jinoiy odil sudlov fakulteti dekani (D.Kamalova) mazkur talabalarning shaxsiy hujjatlar yig'majildiga buyruq nusxasi tikilishini ta'minlasin.

7. Mazkur buyruq bajarilishini nazorat qilish Yoshlar masalalari va ma'naviy-ma'rifiy ishlar bo'yicha birinchi prorektor A.Xashimhonovga yuklansin.

Rektor v.v.b.



I.RUSTAMBEKOV

Toshkent shahar

Kiritildi:

Dekan (Fan nomzodi yoki falsafa
doktori (Ph.D) ilmiy darajasiga yoki
xorijiy davlatlarning unga
tenglashtirilgan boshqa ilmiy
darajalariga yoki dotsent ilmiy
unvoniga ega bo'lgan)

D.KAMALOVA



Kelishildi:

Direktor

SH.PO'LOTOV



Yoshlar masalalari va ma'naviy-
ma'rifiy ishlar bo'yicha birinchi
prorektor

A.XASHIMHONOV



Katta yuriskonsult

A.TURSUNOV



Bo'lim boshlig'i

I.RO'ZIBAYEV



Bosh buxgalter

M.PARPIYEV



Boshqarma boshlig'i

S.BOZAROV



Direktor

X.PIRMEDOVA



Bo'lim boshlig'i

S.RAJABBOYEV

